



# Lajmëtari i Radio Marisë

Gusht 2011

Viti III, Nr. 8

## Në këtë numër do të lexoni

- Fjala e Imzot Zef Gashit në 8-vjetorin e RM-së **2**
- I Lumi Papa Gjoni Pali II dhe Virgjëra Mari (pj. 3) **3**
- Fjala e presidentes së Radio Marisë **4**

**Lajmëtari i Radio Marisë është organ i Shoqatës Radio Maria.**

**Tiranë**

**Rr. Papa Gjon Pali II, Nr. 4**

**Fushë Kërçik**

**Babrru, Paskuqan**

**Tiranë, Shqipëri**

**+355 4 2 346 346**

**Shkodër**

**Sheshi Papa Gjon Pali II**

**Shkodër, Shqipëri**

**+355 22 24 08 52**

**E-mail**

**info@alb.radiomaria.org**

**Përgjegjës**

**Don Prekë Lazraj**

**Radio Maria,  
Hiri i Hyjit në shtëpinë tënde,  
mund të dëgjohet në:**

**Rrëshen e rrethina**

**FM 100.7 MHz**

**Tiranë, Durrës, Kavajë, Berat**

**FM 91.4 MHz**

**Shkodër, Podgoricë, Ulqin**

**FM 102.2 MHz**

**Lezhë, Laç të Kurbinit, Mamurras**

**FM 89.6 MHz;**

**Pukë, Fushë Arrëz, Tropojë,**

**Kukës dhe Kosovë**

**FM 90.0 MHz**

**www.radiomaria.al**

## RADIO MARIA KA NEVOJË PËR TY!

*Pjesë nga fjala e Don Prekës me rastin e 8-vjetorit të Radio Marisë.*

Fillimisht, i falënderoj drejtuesit e TV Rozafës që transmetuan drejtpërdrejt Meshën e shenjtë për atë pjesë të dëgjuesve që nuk mundën të vijnë sot këtu. Ua premtoj lutjet e mia punonjësve të këtij televizioni, sepse këtë transmetim e bënë falas. Dua ta falënderoj, sigurisht në vend të parë, arqipeshkvin e vendit Imzot Angjelo Masafren, i cili nuk mundi të ishte me ne në Meshën e shenjtë, por e kemi bekimin e Tij, me të cilin e kremtojmë këtë Meshë gjithmonë në ditëlindjen e Radio Marisë këtu, ku Zoja ka dashur që të lindë Radio Maria. I falënderoj edhe të gjithë meshtarët e tjerë duke ia nisur nga Don Gjovalini, famullitari i katedrales, meshtari Tadeus, meshtari i ri Don Simon Filipaj, Padër Artani, Don Gabrieli e Don Gerti, dhe Don Ardiani që është në rrëfyestore. E kujtoj edhe Don Simon Jubanin, që tash na sheh nga qielli, e me siguri po lutet për ne dhe për Radio Marinë. Falënderoj edhe motrat prej Hotit të Ri, që kanë ardhur me korin. E kam dëshirën që kur t'i këndojmë Krishtit, të mos i këndojmë me zë të vogël, por të dridhet katedralja, sepse s'ka gjë më të bukur sesa t'i këndojmë Krishtit, të flasim për Krishtin. Këto fjalë ua them të gjithëve, juve këtu dhe dëgjuesve në shtëpi. Kur ta lëvdoni Zotin, le të dridhet toka. Mos kini frikë prej Zotit, sepse prej Zotit i keni të gjitha të mirat. Ju jeni dhurata e Zotit për popullin shqiptar.

Vëllezër e motra të pranishëm, Radio Maria mbështetet në Zotin, në Zojën e Bekuar e në dëgjuesit e vet. Ju falënderoj që jeni zemërgjerë e të fortë, të fortë në fe, shpresë dhe dashuri. Ju falënderoj që e keni sfiduar të nxehtin e keni ardhur ta dëshmoni fenë dhe dashurinë tuaj. Veç mbyllini sytë për një çast dhe mundohuni ta paramendonit Don Prekën në katedrale vetëm. Çfarë trishtimi do të ishte! Por, e falënderoj Zotin për secilin prej jush, të madh e të vogël. Radio Maria është një barrë shumë e rëndë, e nuk mund ta mbajë vetëm një njeri në shtatulla. Mos i dëgjoni mashtuesit që thonë se në Radio Mari punojnë shumë njerëz; në Radio Mari punojnë vetëm 7 vetë! E ka programin 24 orë. Janë në shërbimin tuaj. Të gjithë ju jeni punëtorë të Radio Marisë, por me dashurinë dhe flijimin tuaj. Të gjithë ju kur vini këtu, vini vetëm që të sillni për Radio Marinë. Sa është e fortë Radio Maria? Ajo është e fortë aq sa jep ti për çdo muaj për radion. Nëse ti jep 1 lek, aq forcë ka Radio Maria; nëse jep 10 lekë, aq forcë ka Radio Maria. Po sa janë këta lekë? Këta lekë janë të

barabartë me zemrën, shpirtin dhe dashurinë që e ke për Zotin. Por, Zoti nuk e mat fenë me sasinë e lekëve. Jo, Zoti e mat fenë me dashurinë, me të cilën e mbështesim këtë vepër të Zotit. Kam nevojë për ju. Nuk mund ta besoni se sa të vështirë e kemi të mbërrijmë te miqtë dhe te bamirësit e Radio Marisë. Kam nevojë që secili prej jush të bëjë diçka për këtë vepër të Zotit, sepse na mungojnë edhe 30% e vëllezërve dhe motrave tona, të cilët ende nuk e dëgjojnë zërin e Zotit përmes Radio Marisë. Pa ndihmën tuaj, nuk mund të arrijmë tek ata. Për ndihmën tuaj, do t'i përgjigjeni vetëm Zotit. Ti e ke për detyrë ta ndihmosh veprën e Zotit aq sa të ka dhënë Zoti ty. Nëse Zoti të ka dhënë shumë apo pak, aq e ke për detyrë ta ndihmosh veprën e Zotit. Por, ju lutem që ta ndërrojmë mënyrën e të menduarit. Të mos ju dhimbset gjë për Zotin, sepse kur ju dhimbset diçka për Zotin, të jeni të sigurt se brenda javës do t'ju marrë djalli në tjetrën anë. Nguleni në zemër, shpirt e mendje këtë gjë. Kur unë apo ti nuk ia dhurojmë Zotit me gjithë zemër diçka që Ai kërkon prej nesh, brenda 7 ditëve djalli do të na marrë 10-fish në tjetrën anë. Nuk e ndihmoni veprën e Don Prekës, por veprën e Zotit, veprën e Zojës së Bekuar. Ajo e ka lëshuar Radio Marinë në duart tuaja. Radio Maria do të jetë aq e bukur sa ta zbukurojmë unë dhe ti, sa të falim dashuri ne në Të, sa të lutemi ne në Të, sa ta sjellim Zotin me pushtetin e tij në Radio Mari. Kjo është, pra, detyra jonë. Ju lutem, na ndihmoni që ta rrisim këtë vepër të Zotit. Kam nevojë për ty! Nuk mund ta çoj këtë vepër të Zotit përpara pa ju, sepse Zoti do që Radio Maria të rritet vetëm përmes punës dhe dashurisë së popullit të Zotit. Ju falënderoj edhe ju të dashur të sëmurë që e keni përgatitur këtë festë duke i bashkuar dhimbjet tuaja me ato të Krishtit. Dhashtë Zoti që të na e japë Shpirtin Shenjt përmes lutjeve të Zojës së Bekuar për ta gjetur mënyrën se si ta çojmë zërin e Zotit edhe tek ata që sot nuk mund ta dëgjojnë Radio Marinë. Të gjithë miqve dhe bamirësve të njohur e të panjohur të radios, dhe atyre që kanë kaluar në amshim, ua premtoj lutjen e përditshme dhe Meshën e të premtes për nevojat e tyre.

Dhashtë Zoti që me dashurinë tuaj gjatë këtij viti të bëjmë për Zotin diçka më shumë. Angazhohuni që tani e punoni për Radio Marinë, por me zemrën plot, sepse e kemi për detyrë që së bashku ta sjellim çdo njeri te Zoti. Amen! Qoftë lëvduar Jezu Krishti!

**Don Preka**

## FJALA E IMZOT ZEF GASHIT NË 8-VJETORIN E RADIO MARISË



Vëllezër e motra, më lejoni që në fillim të fjalës sime të përsënderes të zotit e shtëpisë, arqipeshkvin e Shkodër-Pultit, Imzot Masafrën, famullitarin e kësaj famullie, Don Gjovalinin, drejtorin e Radio Marisë, Don Prekën, të gjithë meshtarët e pranishëm, motrat e nderit, korin e këngëtarëve, të gjithë fëmijët, të gjithë juve, sidomos ju bashkëpunëtorëve dhe dëgjuesve të kësaj radioje. Dhe nga zemra ju dëshiroj bekime të shumta dhe huret e Zotit me rastin e kremtimit të 8-vjetorit të themelimit të Radio Marisë në gjuhën shqipe. Shoh se këtu bëhet vërtet fjalë për një realitet të ri. Jam i privilegjuar që sot kam mundësi ta çoj këtë Meshë në nder dhe lavd të të madhit Zot dhe Zojës së Bekuar për ju, për bashkëpunëtorët, për dëgjuesit e Radio Marisë që jeni këtu të pranishëm e për të gjithë ata që na dëgjojnë përmes radios. Pra, siç shihet, pas 8 vjetësh ka lindur një realitet i ri, ka ndodhur një mrekulli në Kishën tonë përmes Radio Marisë. Kjo është një kënaqësi, një konstatim që na mbush me entuziazëm, që na jep shpresa të reja, ka perspektivë për të gjithë ne, edhe për Kishën si institucion, edhe për klerin, edhe për ipeshkvijtë e saj, edhe për të gjithë besimtarët. Dhashtë Zoti që kjo perspektivë të shkojë duke u zgjeruar e përhapur edhe përmes RM-së, anembanë botës sidomos të botës shqiptare kudo qofshin ata.

Pra, është fjala për një lindje të re, për lindjen e një realiteti të ri. Me lindjen në Marinë, dhe përmes Marisë, Jezusi u është dhuruar të gjithë njerëzve. Me lindjen e Jezusit në ne, u realizua një realitet i ri. Virgjëria e Zojës, gëzimi ynë nëpërmjet mishërimit të fjalës së Zotit në kraharorin e saj, bashkëjetesa jonë me Zotin në të tashmen edhe në të ardhmen në amshim, e në lindjen e Jezusit nëpërmjet nesh, që jemi shërbëtorë të Zotit, që jemi anëtarë të kishës, që jemi të zgjedhurit e Zotit,

Jezusi u dhurohet të tjerëve. Këtu realizohet amësia e Kishës, e Zojës së Bekuar, e Radio Marisë, e cila është e ngjashme, pra, me atë të Marisë. Është më se e nevojshme ngjashmëria me Virgjërinë, për arsye se deri tash ajo lindi Jezusin për të tjerët në mënyrë trupore, e në të njëjtën mënyrë lindim ne si bijtë e bijat e saj. Ne jemi ata, pra, të lindur nga kjo amësi shpirtërore e Zojës së Bekuar, ne anëtarët e Kishës, ju bijtë e bijat e Radio Marisë. Kështu, pra, mund ta ilustrojmë këtë realitet të lindjes shpirtërore nëpërmjet Zojës së Bekuar, sikurse është shembulli i Nënë Terezës. Pra, kështu, Nënë Tereza derisa iu përmbajt kushtit të pastërtisë së saj, si rregulltare, ajo e jetoi virgjërinë në një mënyrë të plotë. E kjo ndodh në të gjitha murgeshat e në të gjitha virgjëreshat, në të gjithë meshtarët që realizojnë celibatin e vet. Bëhen nëna shpirtërore, nëna të miliona njerëzve, sepse me veprimtarinë e vet humane (si në rastin e Nënë Terezës), e lindin Zotin në shpirtat e këtyre njerëzve të vdekshëm.

Qëndrimi dhe përcaktimi personal i Marisë dhe virgjëria e saj bënë që ajo të vendoste me gjithë shpirtin e saj jo vetëm për atë personalisht e për shenjtërimin e saj, por edhe për të tjerët, duke pranuar edhe amësinë, në bazë të fjalës së Engjëllit Gabriel dhe të përsënderes së tij në qytetin e Nazaretit. Në shpirt, pra, në pastërtinë virgjërore ajo lindi Zotin me dashuri të përkryer. Me trupin e saj, ajo lind Zotin për shëlbimin tonë e për shenjtërimin e botës. Me trupin e saj, Maria bëhet e tëra vegël, mjet, bëhet mundësi e ardhjes së Zotit tek të tjerët. Pra, virgjëria e saj është parakusht i amësisë së saj. Kështu, amësia e saj patjetër buron prej virgjërisë së saj. Maria prej Nazaretit, po të mos ishte virgjër, nuk do të kishte asnjë mundësi që të bëhej nëna e Jezusit. Mirëpo, pikërisht për shkak të virgjërisë së saj, ajo bëhet Shën Mari, nënë e Zotit, bartëse e Zotit. Bëhet HYJLINDËSE. Me virgjërinë e saj, Ajo lind Zotin në vetvete e me amësinë e saj, ajo ndërmjetëson te Zoti për të tjerët. E bart, e dhuron, ua fal njerëzve birin e vet. Tek ajo, pra, në mënyrë të përkryer plotësohen dy realitete: virgjëria dhe amësia. Bëhet, pra, fjalë edhe për lindjen prej së larti. Sipas asaj që Jezusi i thotë Nikodemit në bisedën ku Jezusi thotë se duhet lindur prej së larti. Pra, shenjtërit, të cilët qysh në tokë kanë qenë të lidhur me Zotin në mënyrë të përkryer, lindjen e tyre e quajnë lindje shpirtërore prej së larti. Së këndejmi, me shtegtimin jetësor, njeriu fillon të ngrihet nga Zoti, që me ndihmën e Tij të bëhet sa më i ngjashëm dhe sa më i afërt me Të. Pra, pak a shumë, kemi përcaktuar kuptimin e lidhjes prej nivelit të pastër Hyjnor, në formë horizontale nëpërmjet hyjnore dhe njerëzore sipas lidhjes apo vijës zbritëse dhe të asaj të pastër njerëzore, po ashtu horizontale që të mund të përfundonim me lindjen e lidhjes prej së larti, tani me origjinë njerëzore-hyjnore. Me ndihmën e saj, njeriu dëshiron që të brendësohet dhe të hyjnizohet në Zotin dhe kah i cili në tërësi dhe përkryeshmërisht dëshiron të kthehet, që të bëhet në Të një për amshim, sipas fjalëve të Shën Gjonit ungjilltar.

Pra, jemi të privilegjuar si bijtë e Zotit me anë të pagëzimit, jemi të privilegjuar për shkak të ndërmjetësit të asaj që e quajmë nëna jonë qiellore. Jemi të privilegjuar sidomos ju dëgjuesit dhe bashkëpunëtorët e RM-së si bijtë e kësaj nëne shpirtërore, e cila sikurse u tha në përsënderjet në fillim të Meshës, është edukatore shpirtërore. Është ajo që nxit, është ajo që frymëzon, është ajo që entuziazmon, është ajo që ndihmon, është ajo që mbështet të gjitha përpjekjet tona për realizimin e asaj që është detyra kryesore e njeriut, shenjtërimi i jetës sonë sipas fjalëve të Ungjillit, sipas vetë fjalëve të Jezusit. Për këtë arsye, ne vëllezër e motra pas këtij devocioni gati 2-orësh në Adhurim dhe Meshë, ju dëshiroj juve e të gjithë njerëzve vullnetmirë, që janë në rrugën e Zotit, që janë duke e shfrytëzuar maksimalisht për mirë këtë liri fetare, këtë hapje të Kishës, këtë organizim të saj në mënyra të ndryshme dhe nëpërmjet RM-së, një ecje të sigurt, një ecje konstruktive të popullit të Zotit, në këtë rast të popullit shqiptar, drejt amshimit me hapa të sigurt, nën mbrojtjen e asaj që e lindi shëlbuesin tonë Jezu Krishtin për shëlbimin dhe për shenjtërimin tonë. Jemi, pra, ata që duhet ta bartim këtë amanet, ta mbartim këtë dritë që është Krishti, shëlbuesi ynë, i cili një ditë na tha edhe neve të bëhemi të ngjashëm me të me fjalët "Ju jeni drita e botës, ju jeni kripa e tokës". Besoj e jam i bindur, sikurse udhëheqësit dhe stafi i radios, se të gjithë ne, së bashku me ju bashkëpunëtorë e dëgjues të nderuar të RM-së, do të përpiqemi që me lutjet dhe kontributet e secilit prej nesh të jemi vërtet kripa e tokës dhe drita e botës për ata që ende nuk besojnë. Ne, pra, përveçse do të japim shembull të mirë si anëtarë të kishës, do të përpiqemi edhe me lutjet tona që ata njerëz që kanë devijuar rrugën e jetës, që e kanë humbur kuptimin e jetës, të kthehen në rrugën e shëlbimit, në rrugën e Zotit, në rrugën që na çon në amshim të sigurt nëpërmjet RM-së, nëpërmjet Zojës së Bekuar, nëpërmjet mësimave ungjillore që i kemi marrë prej vetë Jezu Krishtit, Shëlbuesit tonë. Amen!

## I LUMI PAPA GJON PALI II DHE VIRGJËRA MARI

Ky është një shkrim i punuar nga Imzot Juan Miguel Ferrer Grenesche, Nënsekratr i kongregatës për kultin Hyjnor dhe disiplinën e sakramenteve, të cilin do ta sjellim me pjesë në disa numra të Lajmëtarit.

### ...vazhdon nga numri i kaluar

Në pikën nr. 43, në fundin e Letrës, Papa në mënyrë të veçantë i ftoi të rinjtë duke thënë:

«Një lutje kaq e lehtë, por në të njëjtën kohë kaq e pasur, meriton më të vërtetë që të rizbulohet nga bashkësia e krishterë... Që kjo ftesë e imja të mos mbetet e padëgjuar!...» Dhe duke cituar të Lumin Bartolo Longo, apostullin e Ruzares, përfundoi: «Ti do të jesh ngushëllim në çastet e fundit të jetës. Ty të qoftë puthja e fundit e jetës që fiket. Fjala e fundit e buzëve tona do të jetë emri yt i ëmbël, o Mbretëreshë e Ruzares së Pompeit, o nënë e jona e dashur, streha e mëkatarëve, ngushëlluese sovraane e të varfërve. Ji gjithkund e bekuar, sot e përgjithmonë, në tokë e në qiell».

Nëse këto reflektime mund të përmbledhin linjat themelore të përshpirtërisë mariane të Papa Gjon Palit II, tani do të themi diçka rreth mariologjisë, nga një perspektivë teologjike.

### 1. Gjon Pali II, Magjisteri i tij Marian, linjat teologjike

Studimet e ndryshme për Mariologjinë e Gjon Palit II kanë treguar se ajo themelohej thelbësisht në doktrinën tradicionale të Kishës me theks të rijetësimeve të Kushtetutës “*Lumen Gentium*” të Koncilit II Vatikanas e të mësimave mariane të Papës Palit VI. Nga ana tjetër, linja më e zhvilluar e Papës për Marinë ka qenë ajo e ndërmjetësimit të Marisë, ose «ndërmjetësimit amnor», siç e kishte zakon ta quante Gjon Pali II. Kështu, aspekti mariologjik dhe baritor që përqendruar në praninë aktuale dhe për veprimin efikas të Virgjërës në Kishë dhe në botë.

Në këtë kuptim, ia lejoj vetes që të dalloj dy zbatime të rëndësishme të mariologjisë së Gjon Palit II, që janë relative në dy realitete themelore për të ardhmen e njerëzimit e që reflektohen në dokumentet që u publikuan gjatë magjisterit të tij:

a) Identiteti dhe thirrja e gruas në botë, të cilës Ati i shenjtë ia kushtoi Letrën apostolike “*Mulieris dignitatem*” (15 gusht 1988), që u botua me rastin e Vitit Marian. Një feminizëm që nuk e meriton këtë emër dhe që duket se dëshiron të mohojë vetë bazën e dinjitetit të gruas dhe një ideologji të këtij lloji që pretendon për të vërtetuar lirinë e qenies njerëzore, duke mohuar vetë natyrshmërinë, duke bërë secilën ditë më të ndritshme dhe duke bërë më në përputhje kontributin doktrinor dhe kulturor të kësaj Letre të Papës për Marinë.

b) Vlera e jetës dhe rëndësia e mbrojtjes efikase dhe aktuale të saj. Gjon Pali II ia kushtoi letrën e vet enciklike “*Evangelium Vitae*” (25 mars 1995; sidomos pikat nr. 102-105) kësaj vlere. Një doktrinë e theksuar shumë «në shenjen e Virgjërës Nënë» që i ofrohet botës aktuale, siç kujtoi edhe Papa Benedikti XVI në fillimin e këtij viti liturgjik, duke thirrur një vigjilje të lutjes botërore në nderim të jetës që lind, në të cilën soditja e mistereve të lumturisë së Ruzares zuri një vend të rëndësishëm, përmes rileximit të këtyre teksteve mariane, që janë pjesë e enciklikës së Pararendësit të tij.

Edhe një herë, nga linjat teologjike shihet se bindjet shpirtërore të Gjon Palit II e çuan kah ky nderim edhe përshpirtërinë, teologjinë e krejt jetën e mbarështimin e tij drejt qenies njerëzore, të dashur nga Hyji dhe që ka nevojë për shëlbim. Njësoj si nëna që nuk lodhet duke u kujdesur për fëmijën e saj që është në nevojë ose i humbur.

### 2. Gjon Pali II, një pontifikat i rëndësishëm pas Koncilit II Vatikanas, linjat mariane

Qoftë sinodi i jashtëzakonshëm i vitit 1985, qoftë kremtimi i Jubileut të Madh në vitin 2000, kanë treguar se linja baritore themelore për pontifikatin e gjatë të Gjon Palit II ishte interpretimi i drejtë dhe zbatimi i Koncilit II Vatikanas.

Kjo gjë u konkretizua në një varg veprimesh të mëdha të drejtimt, të cilat do të mundohem që t'i përmbledh këtu, pa pretenduar që të jap një numërim të plotë, nga ato që i konsideroj në mënyrë të përgjithshme më të njohurat.

a) «Kodi i Ri i të drejtës kanonike» (25 janar 1983). Sa i përket kodit do të citoj atë gjë që ai vetë e citoi dhe e porositi shprehimisht, në kontekstin e kultit marian: Lutja e Ruzares (kan. 246 §3). Në këtë normë, që flet për formimin e meshtarëve të ardhshëm, rekomandohet që të vazhdojmë të lutemi, sepse vetëm kështu ia dalim që përmes shembullit të bindjes sonë, këtë përshpirtëri ta sjellim te të gjithë besimtarët.

b) «Katekizmi i Kishës Katolike» (botimi i parë 1992; botimi në gjuhën latine në vitin 1997). Katekizmi, së bashku me udhëzuesin e përgjithshëm të katekezës, që një element i rëndësishëm themelore për punën në transmetimin e fesë dhe formimin e krishterë në të gjitha nivelet. Katekizmi përmban pjesët solide që i kushtohen doktrinës mariologjike (pikat nr. 484-511 dhe 963-975) dhe përshpirtërisë mariane (pikat nr. 971 dhe 2675-2679), duke na kujtuar në mënyrë të veçantë Ruzaren (pikat nr. 971. 2678 dhe 2708).

c) Në fushën liturgjike, Papa Gjon Pali II premtoi «thirrjen» sipas asaj që dha në librat liturgjikë, 25 vjet pas Koncilit. Përbrenda kësaj përmbledhjeje, duhet përfshirë botimi që ka vlerë të madhe liturgjike, teologjike dhe shpirtërore, i «Përmbledhjes së Meshëve të së Lumes Mari Virgjër», përgatitur për kremtimin e Vitit Marian, duke menduar në kultin që kremtohet në shenjtëoret mariane në mbarë botën.

Këto tri veprime të mëdha të Gjon Palit II, së bashku me prekjet e tij mariane, janë një shembull shumë i mirë i përmasës së personit dhe të mbarështimit të këtij Pape të madh.

**Vazhdon në numrin vijues...**

## FJALA E PRESIDENTES SË RADIO MARISË



Jam e privilegjuar që nga ky ambon i shenjtë t'ju uroj të gjithëve gëzuar festën e krijimit të Radio Marisë Shqiptare. Falënderoj shkëlqesinë e tij, ipeshkvin e Shkodrës, Imzot Agjelo Masafrën, për pritjen e ngrohtë, që ia ka rezervuar vazhdimisht RM-së në katedrale. Falënderoj arqipeshkvin e Tivarit, Imzot Zef Gashin, për kremtimin e Meshës së shenjtë për ne, në emër të Zotit, dhe të gjithë meshtarët e tjerë. Ju falënderoj edhe ju dëgjues të dashur e ju miq të RM-së që keni ardhur ta ndajmë së bashku këtë gëzim të madh.

RM në botë ka filluar në vitin 1981 në Itali dhe sot ajo vepron në 61 vende të botës. Presidenti i Familjes Botërore të RM-së, z. Emanuele Ferrario, shprehet me shumë siguri se vetëm ajo, Maria, emrin e të cilës mban radioja, e ka aftësinë që ta përhapë këtë instrument të fjalës së Zotit në kaq shumë vende për një kohë kaq të shkurtër. Kjo për faktin se RM-të në krejt botën kanë një staf shumë të vogël. Ato punojnë me vullnetarë dhe mbahen nga dëgjuesit. Në Shqipëri, realizimi i saj u bë i mundur më 19 korrik të vitit 2003. Që nga kjo ditë, ajo vetëm është rritur. Prej shtatorit të vitit 2005, me anë të internetit, ajo dëgjohet në mbarë botën, me katër studio, në Tiranë, në Shkodër, në Gjakovë dhe në Lezhë, duke mbuluar me valë 70% të territorit të vendit tonë, të gjithë zonën e veriut, të veri-lindjes dhe pjesën qendrore të vendit. Shpresojmë që ta shtrijmë së shpejti dëgjueshmërinë e Radio Marisë edhe në jug të vendit tonë.


Radio Maria ka misionin që ta shpërndajë, bashkë me Kishën, Ungjillin në mbarë botën. Nëse Zoja do të gjejë në ne shërbëtorët besnikë, në të cilët mund të ketë besim, nuk do të na mungojë asnjëherë ndihma e saj dhe do të bëjë mrekulli të mëdha në zemrat e njerëzve. Shumë herë gjatë këtyre viteve kemi hasur në vështirësi të ndryshme, ndonjëherë deri në dëshpërim, por nuk na ka munguar motivimi nga Don Preka duke na thënë 'ecni përpara, se dikush tjetër është pas jush që ju ndihmon'. Dhe me të vërtetë, në çdo rast na kanë dalë miq dhe dëgjues të RM-së që na kanë ndihmuar dhe shpejt e kemi kuptuar se nëse ecim me Marinë, nuk do ta humbasim rrugën. Maria na mëson se Jezusi është jeta jonë, gëzimi ynë dhe paqja jonë, është thesari i çmueshëm që duhet ta sjellim te çdo njeri. Atëherë nuk mundem pa i falënderuar me gjithë shpirt vullnetarët e Radio Marisë dhe u jap një këshill zemre, 'vazhdoni pa u lodhur ta jepni ndihmesën tuaj të madh në rritjen e Radio Marisë duke treguar në popull se RM ekziston, se ajo sjell Ungjillin, sjell Krishtin te njerëzit, përforcon Zërin e Kishës Katolike, edukon lutjen'. Vazhdoni t'i mobilizoni dhe t'i vetëdijesoni dëgjuesit për ta mbështetur Radio Marinë.

Një falënderim i madh dhe i veçantë shkon për të gjithë ju dëgjues të RM-së të pranishëm këtu ose jo, që na përcillni dhe na ndihmoni në përhapjen e kësaj veprë të madhe të ungjillëzimit, e cila pa ndihmën tuaj nuk do ta kishte pasur këtë ecuri që e ka sot; që na mbështetni me lutjet dhe falënderimet tuaja, duke treguar se si po ndikon RM në ndryshimin e jetës tuaj dhe të familjes tuaj, duke qenë shembull për të gjithë të tjerët në lutjen e rruazës së shenjtë bashkë me pjesëtarët e familjes, edhe pse janë larg në shtete të tjera, me anë të internetit. Ju falënderojmë me shpirt që e ndihmoni radion, se kështu na jepni zemër që edhe ne ta vazhdojmë këtë shërbim të shenjtë.

Në veçanti, dua të falënderoj dhe të përshëndes dëgjuesit dhe miqtë e RM-së në Shkodër, qytet që Zoja e zgjodhi për të ngjizur RM-në shqiptare. Ju e mësuat të ecë, ju e rritët dhe tani ajo i shtrin krahët e saj në 2/3 e vendit, duke e çuar zërin e saj në çdo shtëpi, Zërin e Zojës së Këshillit të Mirë dhe të Kishës Katolike në popullin shqiptar. Ky zë sjell paqe dhe gëzim në zemrat e dëgjuesve; është zëri i ëmbël që depërton në jetën e njeriut, duke e përgatitur mëkatarin që ta fitojë pafajësinë, duke ia dhuruar të trishtuarit gëzimin, të sëmurit ngushëllimin, të dëshpëruarit dëshirën për jetë.

Të dashur besimtarë, dëgjues të RM-së, më lejoni që edhe në emrin tuaj ta falënderoj Drejtorin e Radio Marisë Shqiptare, Don Prekën, bashkë me stafin e tij për emisionet e shkëlqyera që realizon çdo ditë në radio. Me emisionet e saj, ajo tashmë është bërë edukatorja e popullit tonë. Atë e dëgjojnë me dashuri dhe admirim njerëzit e të gjitha kategorive shoqërore, të të gjitha botëkuptimeve dhe besimeve. Ajo po na zbulon çdo ditë, përmes fjalës, lutjes dhe mësimi, kuptimin e të jetuarit tonë mbi tokë, kuptimin e mësimi dhe të lutjes, kuptimin e paqes dhe të bashkëpunimit, i cili aq shumë na mungon, marrjen përsipër të përgjegjësi dhe të jetuarit sipas një morali të shëndoshë.

Së fundi, dua të falënderoj z. Gaspër Koka, që mundësoi transmetimin Meshës të shenjtë, shumë e rëndësishme për RM-në, drejtpërdrejt dhe falas përmes TV Rozafës, si dhe z. Alfred Staka, që përmes TV Lezhës ka ndihmuar në promovimin e RM-së në popull. Faleminderit të gjithëve. Qoftë lëvduar Jezu Krishti!



**File Preka**

### PRO CREDIT BANK

LLOGARIA NË EURO 127837030002

Kodi SWIFT: FEFAALFR

IBAN: AL 05209111240000127837030002

LLOGARIA NË LEK 127837030101

Kodi SWIFT: FEFAALFR

IBAN: AL 48209111240000127837030101

### INTESA SAN PAOLO BANK

LLOGARIA NË EURO 1043631803

Kodi SWIFT: USALALTR

IBAN: AL 25208110080000001043631803

LLOGARIA NË LEK 1043631801

Kodi SWIFT: USALALTR

IBAN: AL 79208110080000001043631801

### NË ZVICËR ME 5 FRANGA

Duke telefonuar në numrin:

0900123411

Në bankën CREDIT SUISSE

RADIO MARIA

LLOGARIA NË CHF 361173-10-1

IBAN: CH1804835036117310001